

NIGITIWATAALE NIWAKATE TIMÓTEO

Nigijo Paulo naga idí nagadi liwakatetigi Timóteo, idei niwilogonagaxi digoida nigotaga Roma. Paulo ja yowoogodi moyeloadi nigicoa nokododi. Diniwilo leegodi me diotece Jesus. Nagadi liwakatetigi Timóteo owidije me lidie maleedaga oyeloadi. Paulo didikotibige Timóteo eotibige midioka limedi me dinoniciwagadi me nakato Goniotagodi, codaa dipokota Timóteo me dinageticogi minitaga maleedaga oyeloadi.

Paulo yecoeditibige Timóteo, codaa me diniotagodetalo Aneotedogoji leegodi Timóteo, codaa yelogodita midioka limedi me dipokoteloce nigina me yotaganege Aneotedogoji. Codaa aagaga eo loniciwaga Timóteo me daga niboliga me diotece Jesus, migetaga leegodi Paulo me diniwilo. Pida eo loniciwaga midioka limedi meliodi me nakato Goniotagodi, codaa midioka limedi me diigaxinagatece nigijoa Paulo baanaga iigaxitece. Paulo eo loniciwaga Timóteo me dinatitalo lawikodico micataga daga nigina niotagawa Cristo anele. Paulo eledi yalagata nigica ane leeditibige modaagee Timóteo mijo me nowienogodi loiigi Cristo. Eo leemidi Timóteo leegodi anodaageeteda lakataga nigica oko nigowidijedi nokododi. Paulo yalagata midioka limedi meo ane liigenatakanegegi Goniotagodi idaagee mowidi lawikodico, odaa Goniotagodi icota me yajigote ane lagajegitetema.

Paulo yecoeditibige Timóteo

1 ¹Ee Paulo, ee liigexegi Jesus Cristo, leegodi jigidaa ane yemaa Aneotedogoji. Jesus Cristo idiige me jelogoditibece Aneotedogoji me ligegi me yajigote lewiga ane digica liniogo nigina oko anoyexogotege Jesus Cristo. ²Timóteo, jiwakateetibigagaji nagadi iwakate notaganagaxi, akaami ane micataga degewi makaami ionigi, eliodi me gademaani.

Jemaa Aneotedogoji Godiodi, codaa me Goniotagodi Jesus Cristo midioka limedi meletagadomi, codaa midioka limedi metigadiwikodeni, codaa midioka limedi mowo gadaalegena mele.

Paulo diniotagodetalo Aneotedogoji codaa me iladee Timóteo

³Idioka limedi me iniotagodetalo Aneotedogoji, ane ee liotagi digo mijotaga nigijo jotigide yaamipi modibatema, idioka limedi me jeemitetece me digica ibatiigi catiwedi yaalegena. Codaa idioka limedi me jotaganege Aneotedogoji

noko, codaa menoale. Nigina me jotaganege Aneotedogoji, odaa jipokotalo me gadaxawani. ⁴Nalagatibigiji meliodi manoenitibece nigijo naga jawalacagatiwage. Joanigidaa leegodi meliodi me jemaa me gadatitace, amaleegaga eliodi me idinitibeci. ⁵Eledi nalagatibigiji mewi me iwagati Goniotagodi, agokawii me iwagati. Anakatoni Goniotagodi digo anee eliwagatakanegegi gadami Lóide, ajaa gadiodo Eunice. Ajawienataka me nigidaagee gatiwagatakanegegitema Goniotagodi, digo mijotaga meniwagatakanaga agica degeyamagaticoace.

⁶Leegodi midioka limedi manakatoni Goniotagodi, jemaa manalakitibige mabakeni gadixakedi ane yajigotedagawa Aneotedogoji nigijo naga jipeketagaloco ibaagatedi me gadiomagatitema Aneotedogoji libakedi. ⁷Igaataga Aneotedogoji anajigotedogowa niwigo aneo moko ageleemagipi, pida najigotedogowa Liwigo aneo godoniciwaga, codaa meo me jemaanaga eledi oko, codaa meo me idinajacagatagatema niginoa lidagataka godolaadi codaa me godowooko.

⁸Enice jinaga aniboliki melogotitedibece nibodicetedi anele aneetece Goniotagodi, codaa jinaga anibolitikici me ee niwilogjegi leegodi me ee liotagi Goniotagodi. Pida leeditibige me gadigomi mawikodeetema niginoa godawikodico anenagi leegodi me jelogotagatedibece gobodicetedi anele, digo analeegeji me jawikode. Iniaaginiwa Aneotedogoji yajigotedagawa gadoniciwaga me ixomagateenitedijo niginoa gadawikodico midokee matiteti.

⁹Aneotedogoji godewikatiditace, codaa eniditedogowa godiomagaditedice moko nepilidi. Agodewikatiditace daga leegodi minoa godoenataka anele, pida godewikatiditace leegodi epaa yemaa, codaa idioka limedi meletedogodomi. Aneotedogoji anigica daga yoe nigina iigo naga lowoogo meletedogodomi leegodi nigijo loenatagitedogodomi Jesus Cristo. ¹⁰Nigina natigide, Aneotedogoji ja nikeetedogowa meletedogodomi leegodi nigijo menagi Goniotagodi Jesus Cristo ane Gonewikatitogodi. Ja yaagadi nigijo loniciwaga némaga, odaa ja nikeetedogowa gonimawenegegi me jakataga godewiga ane digica liniogo miniwataga Aneotedogoji, nigijo naga yelogoditedibece gobodicetedi anele.

¹¹Aneotedogoji eote me ee liigexegi, eotedibige me jelogoditedibece gobodicetedi anele, codaa me jiigaxinagatece lotaga. ¹²Joanigidaa leegodi minoa niginoa yawikodico digoina niwilogonagaxi, pida aidiboliga me idiniwilo. Leegodi eliodi me jowoogodi Nigijoa anejiwagadi, odaa leegodi me jowoogodi, ajawienataka me yakadi me yotete ijotawece nigijo ane jajigotalo nigepaagicota noko nige dopitedijo Cristo. ¹³Oleetibige midioka limedi moteteni nigijoa iigaxinaganegeco ane jelogoditedagawa, codaa nigina mawinitibigelogo nigijoa niigaxinaganegeco, iwitece micataga nigina gowinigijegi ane inowikojogota. Odaa oleetibige midioka limedi manakatoni Goniotagodi, me dagamigitice, codaa memaani eledi oko leegodi me gadexocitege Jesus Cristo. ¹⁴Abakeni loniciwaga Aneotedogoji Liwigo ane digeladetigi catiwedi gadaalegena moteteni niigaxinaganegeco anele ane yajigotedagawa Aneotedogoji.

¹⁵Jogowoogoti me dagaleegica mowootibigiji iditawece gonioxoadipi ane nigeladimigipitigi macatagateloco Ásia. Fígelo ijaa Hermógenes eledi idi

liwigotigi pida agaleegagica mowotibigiji. ¹⁶Jemaa Goniotagodi midioka limedi me iwikode Onesíforo loiigiwepodi, leegodi elioditibece meo yoniciwaga, codaa agica daga niboligatici me ee niwilogojegi. ¹⁷Pida nigijo negenoticogi nigotaga Roma, odaa agica daga dinopagadi, odaa ja doletibigiji negepaa idakadi. ¹⁸Jemaa Goniotagodi me iwikode Onesíforo nigica noko nige dopitedijo Cristo. Eliodi mowoogoti meliodi me idaxawa midiaagejo digoida nigotaga Efeso.

Ica iodagawa, icaagica nalokodegecajo, icaagica nawodaganaga

2 ¹Akamagakaami Timóteo, ane micataga degewi makaami ionigi, ele midioka limedi manakatoni Goniotagodi, codaa meloodagateeni gadaalegena, leegodi Cristo idioka limedi meletedagadomi. Eletedogodomi leegodi me godexogotege. ²Odaa nigijoa niigaxinaganegeco ane jiigaxitedagadici, anajipaatalo codaa eliodi oko aagaga owajipatalo, nigijoa niigaxinaganegeco iigaxinitece niginoa goneleegiwadi ane yakadi me jinakatonaga, amaleegaga oyakadi moiigaxitece eledi oko.

³Ixomagateenedijojogiji niginoa ane dakaketagadomi mikeeni makaami nigina Jesus Cristo niodagawa anele. ⁴Nigina iodagawa me diwitide, doletibige meo me ninitibece nigijojogiji ane iomagaditice me iodagawa. Joanigidaa leegodi me dagadiaagica meote niginoa eletidi nibaketedi anowote me dinigaanyetece dinyeelo. ⁵Codaa nigina nalokodegecajo aneo loniciwaga me dinigaanye, adinigaanyetece lale ane nogete, nige daga dioteci icoa ane lakataga ica nalokodegecajo. (Odaa leeditibige madinoniciwagati awii liciagi nigijojogiji nalokodegecajo). ⁶Nigina nawodaganaga aneliodi me diba, joaniginiaa leeditibige modoejegi me dibatege ane niwai. (Akaami adinoniciwagati awii liciagi nigijojogiji nawodaganaga, odaa jagabaatege ganagajegi.) ⁷Owoo niginoa anejitedagawa, odaa Goniotagodi eote mowoogoti ane diitigi inoatawece niginoa ane jelogoditedagawa.

⁸Analakitibige Jesus Cristo, anida aneetetege Davi licogegi, me yewigatace, nigijojogiji me yeleo. Joaniginaaginoa gobodicetedi anele ane jatematitedibece, onelogoditogowa Jesus Cristo me yewigatace. ⁹Etidigoetece galeenatedi micataga daga ee gonematagodi, odaa ja jawikode leegodi me jatematitedibece gobodicetedi anele. Pida baadigica ane yakadi me igoetedi Aneotedogojogiji lotaga, niginoa gobodicetedi anele. ¹⁰Joanigidaa leegodi me idinatitalo inoatawece yawikodico leegodi nigina oko Aneotedogojogiji ane iomagaditedicoace me nepilidi amaleegaga oyakadi moyexogotege Goniotagodi, odaa jigida lewiga miniwataga Jesus Cristo, codaa moyakadi moiwenigide midioka limedi modinawanagaditege, anigida noko nigototalo. ¹¹Nigida nigege ewi nigijojogiji mee,

“Nigina nige godemagawa Cristo,

odaa godewigatace odaa idejonagate miniwataga.

¹²Nigidioka limedi me idinatiigatalo niginoa godawikodico, odaa jagageote gonagatetigi me godiigenatakanagawa Cristo.

Pida nigejinaga me digica anejinagatege,

odaa nebi aagagae me daga godowoogoditeda.

¹³ Nige dagadiaagejiwagataga lotaga,
pida idioka limedi meote nigijo ane ligegi
(odaa iwi anigotedogowa)”.

(Leegodi ayakadi daategeote nigijo ane ligegi.)

Ica nibakecajo aneo Aneotedogoji me ninitedibece

¹⁴ Awii nigina anonakato Goniotagodi monalagatibige nigijoa iigaxinaganegeco. Ajoini Goniotagodi lodoe me dagadiaa nidelaga leegodi niginoa notaga ane dogoyowoogodi ane diitigilo, igaataga nigina me dinotigimade ayaxawa oko anowajipatiogi, pida begeo me dagadiaa eniwagatakanaga. ¹⁵ Adinoniciwagati madinikeeni lodoe Aneotedogoji micataga nigica nibakecajo Aneotedogoji ane yakadi mele, ane daga niboligatece libakedi, ane igenaga me diigaxinagatece Aneotedogoji lotaga anewi.

¹⁶ Pida oxaxini jinaga adinotigimadenitege nigina oko ane dinotigimadetiwage leegodi niginoa notaga ane digica jaogate, nigidi oko ane dogodeemitetibige Aneotedogoji. Igaataga nigina me dinotigimadetiwage, owoeledi oko mepaanaga leegita me yetecetedice Aneotedogoji. ¹⁷ Liigaxinaganegeco ane degewiteda ja yaagadi eliwagatakanegegi, micataga nigina nilotapagajegi ane daga ici ane yelio gobole. Himeneu, jjaa Fileto itoataale niigaxinaganadi ane lemaanigi modinotigimadetegeeledi oko, codaa modiiigaxinagatece ane degewi. ¹⁸ Nigijoa itoataale goneleegiwadi oika nigijoa niigaxinaganegeco anewi, codaa me naigi Goniotagodi jogoika anepewi, odaa jogodiigaxinagatece Aneotedogoji naga ixomagatice me yewikatiditace oko, odaa agaleegeote me godewigatace. Joanigidaa midi oko anoyaagadi eliwagatakanegegi.

¹⁹ Pida nigijoa niigaxinaganegeco anewi Aneotedogoji ane najigotedogowa adiniigi. Micataga nigina lipodagaladi diimigi Aneotedogoji ane ixotedio, ane datite, ane daga digike. Aneotedogoji micataga daga iditedeloco lotaga miditaga nigijo lipodagaladi diimigi, nigijoa lotaga anee,
“Goniotagodi Aneotedogoji yowoogodi ijotawece nigijo anida aneetege”,
codaa ijoeledi ligegi anee,

“Ijotawece anodi mida aneetege Goniotagodi,
leeditibige moika libeyacegeco.”

²⁰ Nigina diimigi-nelegi, liico ligeladi, ada boote idaa baxia oolo, codaa me beexo. Codaa idiwa eletidi бага iwogo, codaa me napaloaga. Nigijo ane nebi diimigi idoka ibake nagajo boote oolo, anaa beexo nigina midi lalokegi, ogoa, domige nigina mini lanaaga ane dagaxa me gonegegi. ²¹ Nigica oko ane daga dioteci nigijoa niigaxinaganegeco ane degewiteda, aneo oko me nibataaga, nigini oko liciaceekawa nagajo boote idaa baxia oolo, anaa beexo, aneliodi niwaló. Nigijo oko agalee liciaceekawa nagajo boote iwogo inaa napaloaga ane degeliodi niwaló. Digo mijotaga nigijo ane nebi diimigi me iomagaditedice nigijoa bootitedi ane dagaxa me diniwaloe, jigidaagee Aneotedogoji me iomagaditedice nigijo



(2 Timóteo 2.20)

oko ane daga dioteci nigijoa niigaxinaganegeco ane degewiteda, eotedibige me yakadi me ibake nigini oko mepoka dibatema. Nigini oko ja igotema Niotagodi me ibake, codaa ja dinenyagadi meo okanicodaagica nibakedi anele.

²²Enice oxaxini niginoa lidekeco godolaadi ane beyagi lionekadi anidioka limedi moyemaa mowote. Pida adinoniciwagati madinegenagati, codaa oleetibige midioka limedi manakatoni Goniotagodi, codaa memaani eledi gonioxoadipi, codaa me gadilakiitege eledi oko. Jigidaa nige gadiciagi nigijoa ane yapidi laalegenali anodipokotalo Goniotagodi me yaxawatediogi. ²³Pida oxaxini adagadinotigimadenitege nigina oko ane dinotigimadetiwage leegodi niginoa notaga ane degeleteda, ane digica jaoga, igataga jogowoogoti nigina oko dinotigimade nigepaa nidelaga. ²⁴Leeditibige nigina liotagi Goniotagodi me daga didele. Pida leeditibige mokaagegitema inatawece oko, codaa me yowoogodi anigota me diigaxinagatece Aneotedogoji lotaga, codaa leeditibige me dinatitiogi nigina oko anodoletibige modinotigimadetege. ²⁵Eledi leeditibige me diniwikodetibece nigina me dinilakidetege nigina ane dogoiite. Ijoatibige Aneotedogoji daga yaxawa modinilaatece libeyacegeco, oadaa jogoyowoogodi niigaxinaganegeco anewi. ²⁶Odaa jigidaagee nigica oko nige yakadi mopitaceloco mele me dowooko, codaa ja iwoko diaabo eloona, ane yatitiogi nigina oko meotibige mowo nigica ane yemaa.

Anodaageeteda nigicoa owidijedi nokododi

3 ¹Timóteo, ele mowoogoti anodaageeteda nigicoa owidijedi nokododi, maleedaga yaagaditeda Aneotedogoji nigina iigo, jinataga owidi nigicoa ane doide. ²⁻⁴Igataga digawini anodaagee nigica oko nigicoa nokododi: Adodigomadadi, dagaxa moyemaa dinyeelo, codaa modi minoa nimawenegeco,

anagaxakenagaga, lemaanigi moiwoeledi oko. Codaa agoyiwagadi eliododipi, agodiniotagodemamaeledi oko, agodeemitetibige Aneotedogoji, agoyemaaeledi oko, otegexaagaga oiwikodeeledi oko. Codaa owo liwitategitigieledi oko, adinajacagaditema niginoa lidagataka lolaadi ane beyagi, codaa loidenaga, codaa odakapetege anele. Ayakadi me jinakatonaga nigina oko liciagi, yediiga mowo loenatagi ane beyagi anowookonaga. Nigica oko odiletibige degeletibigiwajicaticedieledi oko, nalokecaxoli, pida baadogoyemaateda Aneotedogoji. ⁵Nigidi oko onowo modioteci naigi anewi, pida agoika Aneotedogoji me ibake loniciwaga me igi anee me newiga. Timóteo, jinigipecitiogi nigina noiigi liciagi.

⁶Igaataga initibece nigidiwa goneleegiwadi oninaaletiniwace oko owotibige moyakadi modakatiwece niginoa diimaga. Odaa jogoyakadi moiige lewiga niginoda iwaalepodi ane digica mele lowoogo, ane daga leegitibige mowo ane beyagi. Igaataga nigidi iwaalepodi oyemaa modioteci niginoa lidagataka lolaadi ane beyagi. ⁷Nigidi iwaalepodi idioka limedi modoletibige moyowoogodi okanicodaagica gela nakatigi, pida agica nimawenegegi dogoyowoogodi niigaxinaganegeco anewi, codaa agoyakadi moyowoogodi Aneotedogoji. ⁸Nigijo jotigide ijoa itoataale oxikonagaga ane liboonagatedi Janes ijaa Jambres nakapetegi Moisés aneetece lotaga Aneotedogoji. Idaagee niginoa goneleegiwadi abeyacagaga modakapetege niigaxinaganegeco anewi. Agaleegica degele lowooko, otegexaagagalee oyiwigadi niigaxinaganegeco gotiwagatakanegegi. ⁹Pida nigida libakedi agica aneletema, igaataga inatawece oko icota monadi me yetoledi, digo anee nigijo jotigide nigijo oko nogonadi Janes ijaa Jambres me yetoledi nigijo naga nakapetegi Moisés.

Owidijedi Paulo ladeenaganegeco

¹⁰Pida akamagakaami Timóteo jigiwitece nigijo ane jigixitagadici, codaaeledi jigiwitece anodaageji me idewigatema Jesus Cristo, owoogoti nigica anidioka limedi me jemaa me jaotema Aneotedogoji, codaa me jinakato, owoogoti anodaagee me idinatitiogi nigijo oko yakapetedipi, codaa owoogoti me digicaadaga jemaa nigina oko,eledi owoogoti me jixomagateetedijo ijoatawece ane dakaketomi leegodi ibakedi. ¹¹Nigida makaami owoogoti monigaalatibici domogowo anodigotiwa, codaa owoogoti anodaa yawikodigi midiwa nigotadi Antioquia, Icônio, Listra. Eliodi monigaalatibici me domogowo anodigotiwa, codaa eliodi me jawikode. Pida Goniotagodi idatamagateetetege ijoatawece nigijoa yawikodico. ¹²Ewi okanicodaagica oko anidoka yemaa me yewiga me yexogotege Jesus Cristo, nigini oko oigaaletibece odolletibige mowo anodigota, codaa me dawikode. ¹³Pida nigina oko ane beyagi, codaa nigina oko anokowo monakato Goniotagodi, nigidi jegepaanaga owo ane beyagi. Codaa ja dagaxa moninaaletiniwace oko, codaa mepaa dininaaletibigiwaji.

¹⁴Pida akamagakaami Timóteo idioka limedi me iwagati codaa me iwitece nigijoa niigaxinaganegeco anewi anadiniigaxinitece, ane iwagati, igaataga owoogoti nigijo oko anetigadiigaxinitece nigijoa niigaxinaganegeco. ¹⁵Ele

mowoogoti leegodi nigijjo maleegakaami nigaanigawaanigi nogowoogoti niginoa notaga ane icogotedigi miniwataga Aneotedogoji, codaa natigide. Nigidiwa notaga gadiigaxinitece, anida loniciwaga meo gadixakedi manakatoni Goniotagodi. Aneotedogoji anodaagigote me yewikatiditace nigina oko aneyiwagadi Jesus Cristo. ¹⁶Igaataga idiwatawece lotaga Aneotedogoji anoiditedini nigijjoa goneleegiwadi nigijjo naga ikeetediogi Aneotedogoji Liwigo nigica ane leeditibige moiditedini. Ele me jibakenaga lotaga Aneotedogoji me jiigaxinaga oko me jikeenagata libatico, codaa me joxokojogo nigina oko, codaa me jiigaxinaga me dinegenagadi. ¹⁷Joanigidaagee me jibakenaga Aneotedogoji lotaga, jaogatibige nigina oko anowo libakedi Aneotedogoji mida lixakedi ane yopotigi me dibatema Aneotedogoji, codaa me igotema meo okanicodaagica nibakedi anele.

Paulo iige Timóteo me igenagadi me yelogodi Aneotedogoji lotaga

4 ¹⁻²Eliodi me gadajoini lodoe Aneotedogoji iniaa Goniotagodi Jesus Cristo, Nigijjoa ane iwi anigoteta inatawece oko, nigina bagalee newiga codaa me nigijjo baanaga nigo. Leegodi Jesus Cristo me dopitedijo odaa iige inatawece nigina oko, gadajoini me elogodi Aneotedogoji lotaga. Ele midioka limedi me gadigomi melogotitedibece lotaga Aneotedogoji, nigina me eni mele, codaa nigina makati me daga domegele. Eleditace, adinatiita nigina oko, codaa iigaxinitece lotaga Aneotedogoji nigina me enitece libeyacegeco oko, codaa nigina mikeenitiogi libeyacegeco, codaa awii loniciwaga moika libeyacegeco, amanagawini odopitalo Aneotedogoji. ³Igaataga icotalo nokododi nigina oko me dagaleegowajipatalo niginoa niigaxinaganegeco anewi. Pida odioteci nigica anepaa lidagataka lolaadi. Jegepaanaga odoletibige niigaxinaganadi anodiigaxinagatece aninokina anoyemaa nigina oko mowajipata. ⁴Oika mowajipata niginoa niigaxinaganegeco anewi, pida owajipatalo latematiko niginoa laxokodi laamipi ane degewiteda. ⁵Pida akaami бага leeditibige madinajacagati nigina mida okanicodaagica ane dakaketagadomi, codaa madinatiita niginoa ane dakaketagadomi, codaa mawii ane gabakedi melogotitedibece nibodicetedi anele aneetece Cristo, codaa magoti gabakedi Aneotedogoji ane yajigotedagawa mawii.

Paulo nibeotege ica nogeedi anigida noko nige yeleo


⁶Awii nigijjo ane jajoitagadici, igaataga emegeeta ja idigo me ideleo leegodi Cristo, codaa ja nipegi noko me jopitibigimece ditibigimedi. ⁷Idioka limedi me idinoniciwagadi me joletibige me jigeke loniciwaga ane beyagi. Ineliwagaditedini inokododi micataga nigina nalokodegecajo anele me walokodi, odaa ja nigotini me walokodi. Joanigidaageji idioka limedi me jotete codaa me jiigaxinagatece niigaxinaganegeco gotiwagakanegegi. ⁸Odaa nigina natigide jakadi me inibeotege nigica nogeedi anodibatege nigina oko naga gaanyaga. Nigica gonogeedi one godale ane ikee Goniotagodi me yakadi me godegenaga. Goniotagodi ane Goniwinogodi ane igenaga, Joaniginiaa najigotediwa nagaca yale lodoe nigica oko, nigica noko nige iwi anigotediogi inatawece

oko. Goniotagodi aagemoka najigotediwa nagaca yale, pida yajigotediogi lale inatawece oko ane dagaxa moyemaa me age meno lanokegi Goniotagodi.

Paulo ibodicaxi Timóteo

⁹Awii gadoniciwaga me age managi meetaga. ¹⁰Igaataga Demas dagaxa me yemaa niginoa aninoa digoina iigo, anepaga dinelio, oada ja idaladi, jogopiticogi nigotaga Tessalônica. Crescente bogopiticogi macatagateloce Galácia, Tito bigigo macatagateloce Dalmácia. ¹¹Iniokini Lucas bigini digoina meetaga. Oleetibige Marcos, oada gadixigagawa leegodi бага yakadi me idaxawatece niginoa ibaketedi. ¹²Ja jimonyaticogi Tíquico manitaga nigotaga Éfeso. ¹³Niganagi, anadeegitatiwa nagajo iniwetagajo ane joya minitaga Carpo digoida nigotaga Trôade. Eledi jipokotagawa manadeegi yotaganagaxiidi, pida enegegi jopotibige nigijoa notaganagaxiidi laamotiidi ewacogo.

¹⁴Nigijo goneleegiwa ane liboonagadi Alexandre nigijo anani laxacogonagaxi lajo gapilecege, owidi loenatakatomi ane beyagi. Pida Goniotagodi epaa dinilakidetetege leegodi nigijoa loenatakatomi ane beyagi. ¹⁵Akaami eledi adowetitibige nigijo goneleegiwa, leegodi eliodi me dakapetege niginoa notaga ane jelogotagatedibece.



(2 Timóteo 4.13)

¹⁶Nigijjo odoejegi me idinikee lodoe goniwinogodi me ininigodi nigijjoa notaga anodakapetigi, agica ane idinienaganeege, pida iditawece nigidi oko etidikatice. Pida ajemaa Goniotagodi daga laagetedipi nigijjo oko leegodi metidika. ¹⁷Pida Goniotagodi iniwa meetaga, idinienaganeege, odaa najigotediwa yoniciwaga me jelogodi nibodicetedi anele aneetece Cristo. Odaa inatawece nigina oko ane daga judeutedi digoina meetaga owajipatalo yotaga. Joanigidaagigotediwa Goniotagodi me idatamagateetetege ane doide, liaon nioladi.

¹⁸Goniotagodi idatamagateetetege inoatawece ane beyagi, codaa jowoogodi me idadeegitedibigimece ninioxadi digoida ditibigimedi. Odaa jemaa midioka limedi minatawece oko onelecaatee Liboonagadi Goniotagodi. Jigidaagee (Amém).

Owidijedi lotaga Paulo me dibodenaga

¹⁹Jemaa me idecoaditibige Priscila ijaa Áquila, codaa me loiigiwepodi Onesíforo. ²⁰Erasto бага nenyagati manitaga nigotaga Coriinto, Trófimo idiaa jaladite manitaga nigotaga Mileto leegodi deelotika. ²¹Ina bagawii gadoniciwaga manootiwa maleedaga limedi niwetaga. Êubulo, Prudente, Lino, Cláudia, codaa inatawece eledi gonioxoadipi oyecoaditibigagaji.

²²Jemaa Goniotagodi Jesus Cristo midioka limedi me noiigiwa gadiwigo. Codaa jemaa midioka limedi meletedagadomitiwaji. Odaa joanigidaagee.